

## हनुमान-चालीसा---

श्रीगुरु चरण् सरोजरज, निजमनमुकुर सुधार । बरणौ रघुबर बिमल यश जो दायक फलचार ॥

बुद्धिहीन तनु जानिके सुमिरौ पवन कुमार । बल बुद्धिविद्या देहु मोहिं हरहु कलेश विकार ॥

\* 1 \* जय हनुमान ज्ञान गुण सागर । जै कपीस तिहुँ लोक उजागर ॥

\* 2 \* रामदूत अतुलित बलधामा । अंजनि-पुत्र पवन-सुत नामा ॥

\* 3 \* महाबीर बिक्रम बजरंगी । कुमति निवार सुमति के संगी ॥

\* 4 \* कंचन बरण बिराज सुबेशा । कानन कुंडल कुंचित केशा ॥

\* 5 \* हाथ बज्र औ ध्वजा बिराजै । काँधे मूँज जनेऊ साजै ॥

\* 6 \* शंकर-सुवन केशरी-नन्दन । तेज प्रताप महा जग-वंदन ॥

\* 7 \* विद्यावान गुणी अति चातुर । राम काज करिबे को आतुर ॥

\* 8 \* प्रभु चरित्र सुनिबे को रसिया । रामलषण सीता मन बसिया ॥

\* 9 \* सूक्ष्म रूपधरि सियहिं दिखावा । विकट रूप धरि लंक जरावा ॥

\* 10 \* भीम रूप धरि असुर सँहारे । रामचन्द्र के काज सँवारे ॥

\* 11 \* लाय सजीवन लखन जियाये । श्री रघुबीर हरषि उर लाये ॥

\* 12 \* रघुपति कीन्ही बहुत बडाई । तुम मम प्रिय भरतहिसम भाई ॥

\* 13 \* सहस बदन तुम्हरो यश गावैं । अस कहि श्रीपति कण्ठ लगावैं ॥

\* 14 \* सनकादिक ब्रह्मादि मुनीशा । नारद शारद सहित अहीशा ॥

\* 15 \* यम कुबेर दिगपाल जहाँते । कवि कोविद कहि सकैं कहाँते ॥

\* 16 \* तुम उपकार सुग्रीवहिं कीन्हा । राम मिलाय राजपद दीन्हा ॥

- \* 17 \* तुम्हरो मंत्र विभीषण माना । लंकेश्वर भये सब जग जाना ॥
- \* 18 \* युग सहस्र योजन पर भानू । लील्यो ताहि मधुर फल जानू ॥
- \* 19 \* प्रभु मुद्रिका मेलि मुख माहीं । जलधि लाँधि गये अचरजनाहीं ॥
- \* 20 \* दुर्गम काज जगत के जेते । सुगम अनुग्रह तुम्हरे तेते ॥
- \* 21 \* राम दुआरे तुम रखवारे । होत न आज्ञा बिन पैसारे ॥
- \* 22 \* सब सुख लहै तुम्हारी सरना । तुम रक्षक काहू को डरना ॥
- \* 23 \* आपन तेज सम्हारो आपै । तीनों लोक हाँकते काँपै ॥
- \* 24 \* भूत पिशाच निकट नहिं आवैं । महाबीर जब नाम सुनावैं ॥
- \* 25 \* नाशौ रोग हरै सब पीरा । जपत निरन्तर हनुमत बीरा ॥
- \* 26 \* संकट से हनुमान छुडावै । मन क्रम बचन ध्यान जो लावै ॥
- \* 27 \* सब पर राम तपस्वी राजा । तिनके काज सकल तुम साजा ॥
- \* 28 \* और मनोरथ जो कोइ लावै । सोइ अमित जीवन फल पावै ॥
- \* 29 \* चारों युग परताप तुम्हारा । है परसिद्ध जगत उजियारा ॥
- \* 30 \* साधु संत के तुम रखवारे । असुर निकंदन राम दुलारे ॥
- \* 31 \* अष्टसिद्धि नव निधि के दाता । अस बर दीन जानकी माता ॥
- \* 32 \* राम रसायन तुम्हरे पासा । सदा रहो रघुपति के दासा ॥
- \* 33 \* तुम्हरे भजन रामको पावै । जन्म जन्म के दुख बिसरावै ॥
- \* 34 \* अन्त काल रघुपति पुर जाई । जहाँ जन्म हरिभक्त कहाई ॥
- \* 35 \* और देवता चित्त न धरई । हनुमत सेइ सर्व सुख करई ॥

\* 36 \* संकट हरै मिटै सब पीरा । जो सुमिरै हनुमत बल बीरा ॥

\* 37 \* जै जै जै हनुमान गोसाई । कृपा करहु गुरुदेव की नाई ॥

\* 38 \* जोह शत बार पाठ कर जोई । छुटहि बन्दि महासुख होई ॥

\* 39 \* जो यह पढै हनुमान चालीसा । होय सिद्धि साखी गौरीसा ॥

\* 40 \* तुलसीदास सदा हरि चेरा । कीजै नाथ हृदय महँ डेरा ॥

पवनतनय संकट हरन, मंगल मूर्ति रूप । रामलषन सीता सहित, हृदय बसहु सुरभूप ॥